

12. ¡Algarabán comí!...

- **Lugar:** Roayer, AYER.
- **Narradores:** Vitoria Álvarez Bigotes, 76 años (2001).
- **Recopilador:** Xosé Antón Fernández Martínez «Ambás».
- **Grabaciones:** Cuentu: *¡Algarabán comí!* • Cuentu de mentires: *Una vez yera y nun yera* • Cuentu: *Una fartura de panchón*.

• [Cuentu: *¡Algarabán comí!*]

[Vitoria]: Era una tordina que tenía un nial en una espinera, y llegaba la raposina:

—¡Tordina, si nu[n] me das un tordín córtote la espinera con el rebu!

Volvía otro día:

—¡Tordina, si nu[n] me das un tordín córtote la espinera con el rebu!

Claro, la tordina mui disgustá porque comía-y los... pasó por allí la prima garabana...

—¿Qué tienes, prima, por qué lloras?

—Porque vien la raposina y dizme que si nu[n]-y doi un tordín que me corta la espinera con el rebu.

Y diz e||a:

—¡Ah, tontona!, dile qu'azaos con aceros que cortan maderos, y no rabos lisonjeros.

A otro día pasa la raposina:

—¡Tordina, si nu[n] me das un tordín córtote la espinera con el rebu!

—¡Azaos con aceros cortan maderos, y no rabos lisonjeros!

—¿Enda, quién t'aprendió tanto, ho?

—La mio prima garabana.

Fue pa la orie||a'l río, taba la garabana saltando de piedra en piedra, va la raposina y agárrala... fai la garabana:

—Ná, tienes que decir «garabán comí», porque si no mios padres andan buscándome tola nuechi y nu[n] m'encuentran y... así yá saben que me comiste...

Entós va la raposina y...

—¡Aljarabán comí!

La garabana escapa y diz e||a:

—¡A otra, que non a mi!

• [Cuentu de mentires: *Una vez yera y nun yera*]

Una vez yera y nun yera y andaba arando, los fíos que nun tenía traíalos afesoriando, y él como yera y nun yera atóse a la guiá y chose a roar pela tierra abaxo, iba per un camín alantre, encontróse con quien nun venía, encontró cien raposos, todos cien llabelosos, topó cien calderos de miel, nun tenía en que lo echare, chó mano tras de la ureya topó un piuyu como una oveya, dio d'equí y dio d'ellí, topó un fue||e en que lo echare, fo pa casa y topó la muyer faciendo cien calderos de faricos...

—¿Pa quién fais tantos faricos?

—Pal que me traiga miel.

Yo como lo traía, con una pala de dientes metímelos toos en vientre y fui pa misa como un home n'ayunes. Cuando el señor cura decía «oramos», yo entendía-y «cagamos», y cuando decía «oremos», «caguemos». Cagar, cague-mos, tola iglesia engorronemos, las muyeres que traían saya nadaban como una sopa, los rapacinos metíanse pelos furaquinos, y yo como yera y nun yera púxe-me en altar, nu[n] me tocó ná.

• [Cuentu: *Una fartura de panchón*]

Ese del panchón ná, ye que yera una pareja, y taban en casa... bueno nun sé si yeran novios si yeran.... matrimonio nun serían, nun sé qué yeran. El casu ye que los padres, los paisanos foren pa la cama... ellos tenían una caldera con... fixoren panchón callando tamién, y fixoren panchón y comioren panchón hasta que se fartucoren y después coloren pa la cama...

Los paisanos ya habían ío primero a echar, foren esos dos, foren pa la cama y cuando taban ena cama... él descompúxose, féixose-y descomposición, que tenía una gana cagar que se moría, diz ella:

—Vete y escargueta en fuebo –yera antes cuando se tizaba en suelo—escargata a!!í entre la ceniza y caga a!!í.

Volvó otra vez:

—¡Ai, tengo una gana cagar que me muero!

—Bueno, pues caga en la calderina mariella que ta encima'l fuebo.

Fo y volvió y cagó na calderina mariella. Volvó que tenía gana cagar que se moría. Diz ella:

—Caga en la montera de mio padre que ta encima l'esquenu.

Fo y cagó-y ena montera, y enseguida volvió que tenía más gana de cagar...

—Tengo más gana cagar que... que.

—Vete... en las botas de mio padre que tan allí y caga nellas.

Cuando [paró] yá volvió p'allá, dixo e||a:

—¡Oi, pos ahora yo tengo una debilidadá...! Habías a traeme un poco panchón.

Él fo p'allá y agarró una bola de panchón y al dir, enverde dir pa l'habitación de... de e||a, engañóse nun llao y metóse pa la de los vieyos- Él que se dio cuenta y había remangao la cama que... que yeran los vieyos soltó la bola del panchón allí y escapó. Cuando la vieya nun sé que fo a topar, toparía una cosa blanda y dixo e||a:

—¡Ah, ninu, tu caguiste!

—¡Calla muyer!, ¿qué iba a cagar?

—¡Toca aquí!

Fo y tocó, diz él:

—¡Ai, perdíu de mi, yá cago y nu[n] lo siento!

Llevantóse, diz [e||a]:

—Llevantate, anda, y vete a llavar las manos y ven. Tiza un poco el fuebo...

—que nun tenían luz o eso.

Fo a escargatar en fuebo:

—¡Ah, muyer, aquí ye too mierda!

—¡Llava las manos ena calderina mariella!

Fo a llavar las manos, too mierda.

—¡Pon la montera y los zapatos, y vete a la presa!

Fo a poner la montera, llenóse de mierda los zapatos y... ¡tará tovía llavándose a estas horas ena presa!



12. *¡Algarabán comfl...*

VITORIA ÁLVAREZ BIGOTES col so nietu David.

Roayer, AYER

Semeya: Ambás

